

Է. Բ. ԱՂԱՅԱՆ

(Մենդյան 60-ամյակի առթիվ)

Լրացավ անվանի լեզվաբան, Հայկ. ՄՍՀ ԳԱ թղթակից-անդամ, պրոֆեսոր, բանասիրական գիտությունների դոկտոր, գիտության վաստակավոր գործիչ Է. Բ. Աղայանի ծննդյան 60-ամյակը:

Եղուարդ Բագրատի Աղայանը ծնվել է 1913 թ. մարտի 16-ին, Մեղրիում: Տեղում ըստանալով միջնակարգ կրթություն, 1933 թ. ընդունվել է Երևանի պետական համալսարանի լեզվագրական ֆակուլտետ, որն ավարտել է 1938 թ.: Նույն թվականի դեկտեմբերին ընդունվել է ասպիրանտուրա գրաբարի գծով: 1941 թվականին պաշտպանել է թեկնածուական, իսկ 1945 թ.՝ դոկտորական դիսերտացիա: 1946 թ. ստացել է պրոֆեսորի կոչում: 1953 թ. նա ընտրվել է Հայկական ՄՍՀ գիտությունների ակադեմիայի թղթակից-անդամ:

1939 թվականից Է. Աղայանը դասախոսել է Երևանի պետական համալսարանում, ուր ավանդել է լատիներեն, լեզվաբանության ներածություն, գրաբար, ապա և՛ պարսկերեն, պարսից գրականություն, Արևելքի գրականություն, ընդհանուր լեզվաբանություն, համեմատական ֆերականություն: Դասախոսական աշխատանքին զուգընթաց նա կատարել է նաև վարչական աշխատանքներ. վարել է համալսարանի բանասիրական ֆակուլտետի դեկանի, համալսարանի գիտական մասի պրոդեկտորի, արևելյան լեզուների ամբիոնի վարիչի, Հայկ. ՄՍՀ ԳԱ լեզվի ինստիտուտի դիրեկտորի տեղակալի պաշտոնները: 1954 թվականից մինչև այժմ նա համալսարանի ընդհանուր լեզվաբանության ամբիոնի վարիչն է. ինչպես նաև հասարակական կարգով ղեկավարում է ակադեմիայի լեզվի ինստիտուտի ընդհանուր լեզվաբանության բաժինը և համալսարանի հայագիտական կենտրոնը:

Հարուստ ու բազմազան է եղել Է. Աղայանի գիտական հետախոնդումները: Նրան հատկապես զբաղեցրել են լեզվի գիտության տարբեր բնագավառներ՝ ընդհանուր լեզվաբանության, հայ բարբառագիտության, հնչյունաբանության, բանագիտության, ստուգաբանության, հայոց լեզվի ու հայ լեզվաբանության պատմության խնդիրները, ինչպես նաև բանասիրական այլ հարցեր:

Իր դասախոսական և վարչական աշխատանքներին զուգընթաց պրոֆ. Աղայանը հրատարակել է 70-ից ավելի գիտական աշխատություններ. «Լեզվաբանության ներածություն» (ունեցել է մի քանի հրատարակություն՝ 1949,

1952, 1963, 1967 թթ., նույնը 1960 թ. հրատարակվել է ռուսերեն), «Մեղրու բարբառ» (1954 թ.), «Հայ լեզվաբանության պատմություն» (հ. I, 1958 թ., հ. II, 1962 թ.), «Գրաբարի ֆերականություն» (հ. I, գիրք Ա., 1964 թ.), «Հայոց լեզու» (միջնակարգ դպրոցի դասագիրք՝ Հ. Բարսեղյանի հեղինակակցությամբ, 1965 թ., հետագայում ունեցել է մի քանի հրատարակություն), «Ժամանակակից հայերենի հոլովումը և խոնարհումը» (1967 թ.) և այլն:

Նրա հոդվածներից առանձնապես հիշատակելի են «Բարբառային հնագույն տարբերությունները հայերենում» (ՀՄՍՀ ԳԱ «Տեղեկագիր», 1958, № 5), «Հայերենի հնչյունային համակարգի պատմությունից» («Պատմա-բանասիրական հանդես», 1961, № 1), «Լեզվական կառուցվածքի մակարդակները» («Բանբեր Երևանի համալսարանի», 1967, № 1) և այլն: Շուտով լույս կտեսնի հեղինակի «Ժամանակակից հայերենի բացատրական բառարանը» մեկ հատորով, որը պարունակում է 100.000 բառ:

Սկսած 1953 թվականից Է. Աղայանը իր ժամանակի զգալի մասը նվիրել է Հ. Անանյանի հայոց լեզվի «Լիակատար ֆերականության» և այլ աշխատությունների հրատարակության պատրաստման շնորհակալ գործին:

Է. Աղայանը մեկն է սովետահայ այն լեզվաբաններից, որոնք տասնյակ տարիներ առաջ են մղել հայ լեզվաբանական միտքը: Նա կառուցվածքային լեզվաբանության հիմնադիրներից է հայ իրականության մեջ. նրա հրապարակած մի շարք հետազոտություններ կատարված են լեզվաբանական նորագույն մեթոդների ու սկզբունքների կիրառմամբ:

Շատ մասնագետներ է անցցրել պրոֆ. Աղայանը, որոնք այսօր հաջողությամբ աշխատում են հայագիտության զանազան բնագավառներում, նրանցից շատերը գիտության թեկնածուներ և դոկտորներ են:

Հայաստանի կառավարությունը բարձր է գնահատել Է. Աղայանի գործունեությունը. նա պարգևատրվել է ՀՄՍՀ Գերագույն սովետի պատվոգրերով. նրան շնորհված է գիտության վաստակավոր գործչի կոչում:

Վաստակաշատ գիտնականը ապրում է իր կյանքի հասուն շրջանը, որը լի է ստեղծագործական մտահղացումներով: Ցանկանք նրան առողջ և երկար տարիների բեղմնավոր կյանք:

Պ. ՀԱՐԱԲԵԱՆՅԱՆ